

A DEVELA PORTRET DI MERDADO

“DADA” PICUS NA STADHUIS

RECONOCIMIENTO NA UN MAESTRO ARTISTICO LOCAL CU A CREA OBRANAN MAGISTRAL DI E ARTE DI ARQUITECTURA

STA. CRUZ -- Diahuebs siman pasa, 26 di Juni 2008, a devela e portret di Merdado Dada Picus (q.e.p.d.) na Stadhuis, cual edificio a ser diseña pa su persona. Na e ocasion special aki tabata presente Minister di Cultura, sr. Tai Foo Ramon Lee, director di Oficina di Monumento, sra. Ing. Yvonne Webb-Kock y Director di Senso, sr. Roberto Pablo, sr. Geovanni Janga, sr. Elmer Janga y nan famia. E idea pa pone portret di Dada, manera el'a wordo yama cariñosamente, a bin di su dos nietonan Geovanni Janga y Elmer Janga. Ta nan, huntu cu nan famia, a regala Stadhuis e potret bunita encuadra aki pa e sirbi como recuerdo y alavez homenahe. E nietonan Janga a elabora riba e obranan cu nan welo a realiza y a gradici pa e honor cu 'Dada' awor ta dorna e muraya historico di Stadhuis cual el'a diseña. Ministro di Cultura na su turno a gradici e famia pa e bunita gesto aki y a elabora cu nos tin cu duna honor nan nos hendenan local, ora nan realiza obranan asina magistral cu ta forma parti di nos herencia monumental. E directora di Oficina di Monumento tambe a enfoca riba e arte mengua

cu 'Dada' tabata domina y ta admira su inspiracionan arkitectonico.

KEN TA DADA PICUS? Merdado (Dada) Picus a nace riba 8 di Juni 1901 y a fayece riba 5 di April 1973. Su nomber di carino ta 'Dada'. Antes, tabata construi casnan door di empresanan familiar. E ofishi ta pasa di tata pa yiu(nan). No tur ora esaki ta keda na un ofishi specifico, probablemente pasobra di e forma ey lo tin mucho tiki trabao. Dada Picus tabata un maestro di construccion Arubano. E tabata un carpinte y ebanista, pero tambe Dada tabata traha ornamentonan constuctivo di kalki, cemento y beton fotifica. Obranen cu Dada a realiza ta, nos Stadhuis na Wilhelminastraat 6, Wilhelminastraat 7. Cas pa Machi Arends, Concessielaan 10 cas pa Henny Arends, Fergusonstraat. 26 cas pa famia Croes, Steenweg 17-19, Wilhelminastraat 24 pa Edison Croes, Bontemantelstraat 13, Catunastraat, Caya Ernesto Petrona, 16, 18 y 22, y mucho otro mas. Semper e ta usa hopi palo den e edificionan pa vloer, plafond, bentana, porta y kozijn, cualnan e ta realiza cu beitel y martiu. Por

ehempel den Stadhuis, tur e palo di e bentana mitar rondo ta original ainda. Hopi di su casnan tambe por reconoce na e 'picusconsole'. Lamentablemente ningun di su dibuhonan (esta, e mapanan) ta warda riba papel mas. Tur palo e tabata laga bini di Colombia. E tabata traha cahanan di morto tambe y tabata traha cilindernan (na man) pa caha di orgel pa entre otro, Rufo Wever. Tambe Dada a traha hopi adorno tambe pa nos casnan floria. E tabata un homber hopi keto, semper canando cu su pipa den boca y no tabata gusta comparti su conocimiento cu otro hende. Dada Picus, un yiu di tera, Arubiano, cu tabata un maestro cu tabata dibuha y efectua su arte y inspiracion combina. Dada, tabata loke nos ta yama un artista riba su mes, cu a siña su mes y a practica su arte. Sin duda Dada Picus, merece di ta den nos Stadhuis. Awor su retrato ta colga pa semper den Stadhuis, pa asina nos pueblo por keda admir'e. Un y tur ta invita pa admira esaki y busca mas informacion tocante nos monumento y artistanan local.

Compila pa Oficina di Monumento.

